



Aqqalu C. Jerimiassen
Atassut

UPA 2026/43-1
30. april 2026

**Uunga siunnersuut: Danskisut innuttaassuseqarneq pillugu inatsisip Kalaallit Nunaanni
atuutilersinneqarnerat pillugu Namminersorlutik Oqartussat peqquneqarnissaannut
akuerissagaat pillugu Inatsisartut aalajangiinerat.**

(Isumaginninnermut, Suliffeqarnermut, Ilaqutariinnut Nunamullu Namminermut

Naalakkersuisoq)

Innuttaassuseqarneq pillugu inatsisip nutarterisoqarnissaannut naalakkersuisut
naleqqussaasariaqarnermik oqariartuuteqarlutik saqqummiussaqaarnerannut Atassummiit
qujavugut.

Atassutip qangaaniilli pilersinneqaqqaarpiarnerminiit oqariartuutiguartarsimavaa
Naalagaaffeqatigiinnerup iluani nalingiimmik atungassaqaartariaqartugut, atungarissaarnikkullu
sorpasuartigut tamatta assigiimmik pisinnaatitaaffeqluta inissisimasariaqavissornerput. Taannali
1979-iminngaanniilli 2025 tikillugu pituttornerunertut isiginiarneqarlunilu taaniarneqartarpoq
partiinit allanit, USA-ili pilerneratigut suna Atassutip oqariartuutigisarsimaneraa kiisami
paasineqalersutut illuni, ila Naalagaaffeqatigiinnerup iluaniuna nalingiimmik pineqarnissarput
pisaripput pituttornerunissarpuunngitsoq.

Naalagaaffinngornissaq ukiorpanni akikinaarlugu qinerisartunut pointinnanniutaajuarsimasoq
kisiartaalluta Atassummi allaaneruffiguartarsimavarput, 2013-iminngaanniilli Atassut inatsisartuni
marluinnarnik ilaasortaataqartarluni pisuutitaaniartarsimaqaaq suliap naalagaaffinngornissamut
arriillisarneqaranut kinguarsaasutullu, tasanili illuanut mumikkusuummernarpoq
apeqqutigissallugu; qanoq ililluni Atassut ataasiaannarluniluunniit naalakkersuinikkut
siuttuunikuunngitsoq tasanimita kinguarsaataassagami? Apeqqut inuiaqatigiinni
tikkuartuiuartunut utertilaarparput.

Uani aalajagiiffigisassatut siunnersuummi innuttaassuseqarnerup nunatsinnut atuutsinneqartup
tulluarnerusumik inissisimatinneqarnissaa eqqarsaatigalugu Atassummiit suleqataalluassalluta
piareersimavugut.

Naalagaaffimilu oqartussaasunut saaffigininnermi uagutsinnut tulluarnerpaamik inissiinissamik
siunertaqartumik naalakkersuisutta sulinissa kissaatigaluguttaaq.

Taamatut oqaaseqarluta siunnersuut ilusaatut itsillugu taperserparput, pisariaqartinneqassappalli
amerlanerussuteqartunit Inatsisiput ataatsimiitsitaliakkoorteqqaarneqarnissaa aporfilernagu.